

說郭

正四十八

イ曾12
6
48



特
112
6
48



說郭目錄

身第四十八

朝野僉載 張鷟

唐國史補 李肇

唐闕史 吳兢

唐語林 王彥

大唐新語 劉肅

大唐奇事 馬總

三聖記 李德裕



說郭目錄
身四十八

先友記 柳宗元

懷舊記 鄭世賢

賓佐記 杜祐

皮子世錄 皮日休

盧氏雜說 盧言

零陵總記 陸龜蒙

玉堂閒話

朝野僉載

唐 張鷟

貞觀年中定州鼓城縣人魏全家富母忽然失明問
 卜者王子貞子貞為卜之曰明年有人從東來青衣
 者三月一日來療必愈至時候見一人着青紬襦遂
 邀為設飲食其人曰僕不解醫但解作犁耳為主人
 作之持斧繞舍求犁轅見桑曲枝臨井上遂斫下其
 母兩眼煥然見物此曲桑蓋井之所致也

周郎中裴珪妾趙氏有美色曾就張璟藏十年命藏



朝野僉言
曰夫人目長而慢視准相書猪視者淫婦人目有四
白五夫守宅夫人終以姦廢宜慎之趙笑而去後果
與人姦没入掖庭

洛州有士人患應病語卽喉中應之以問善醫張文
仲經夜思之乃得一法卽取本草令讀之皆應至其
所畏者卽不言仲乃錄取藥合和爲丸服之應時而
愈

後魏孝文帝定四姓隴西李氏大姓恐不入星夜乘
鳴駝倍程至洛時四姓已定訖故至今人謂之駝李

焉

鄭愔爲吏部侍郎掌選賊汚狼籍引銓有選人繫百
錢於靴帶上愔問其故荅曰當今之選非錢不行愔
默而不言

天后中契丹李盡忠萬榮之破營府也以地牢囚僕
俘數百人聞麻仁節等諸君欲至乃令守囚霽等給
之曰家口饑寒不能存活求待國家兵到吾等卽降
其囚日別與一頓粥引出安慰曰吾此無飲食養汝
又不忍殺汝總放歸若何衆皆拜伏乞命乃給放去

至幽州具說饑凍逼迫兵士聞之爭欲先入至黃麀
峪賊又令老者投官軍送遺老牛瘦馬於道側仁節
等三軍棄步卒將馬先爭入被賊設伏橫截軍將被
索縶之生擒節等死者填山谷罕有一遺

永徽年以後人唱桑條歌云桑條芘女韋也樂至神
龍乍中逆韋應之諂佞者鄭愔作桑條樂詞十餘首
進之逆韋大喜擢之爲吏部侍郎賞縑百疋

周垂拱已來苾拏兒歌詞皆是邪曲後張易之小名
必拏

趙公長孫無忌以烏羊毛爲渾脫氊帽天下慕之其
帽爲趙公渾脫後坐事長流嶺南渾脫之言於是效
焉

魏王爲巾子向前踏天下欣欣慕之名爲魏王踏後
坐死至孝和時陸頌亦爲巾子同此樣時人又名爲
陸頌踏未一年而陸頌頌

咸亨已後人皆云莫浪語阿婆喚三叔聞時笑殺人
後果則天卽位至孝和嗣之阿婆者則天也三叔者
孝和爲第三也

天后時謠言曰張公喫酒李公醉張公者斥易之兄弟也李公者言李氏大盛也

孫佺爲幽州都督五月北征時軍師李處郁諫五月南方火北方水火入水必滅佺不從果沒八萬人昔竇建德救王世克於牛口谷時謂竇入牛口豈有還期果被秦王所擒其孫佺之北也處郁曰殮若入咽百無一全山東人謂溫飯爲殮音孫幽州以北並爲燕地故云

龍朔年已來百姓飲酒作令云子母相去離連臺拘倒子母者盞與盤也連臺者連盤拘倒盞也及天后永昌中羅織事起有宿衛十餘人於清化坊飲爲此令此席人進狀告之十人皆棄市自後廬陵徙均州則子母相去離也連臺拘倒者則天被廢諸武廷放之兆

開元五年春司天奏玄象有青見其災甚重玄宗震驚問曰何祥對曰當有名士三十人同日冤死今新及第進士正應其數其年及第李蒙者貴王家婿上不言其事密戒主曰每有大遊宴汝愛婿可閑留其

家主居昭國里時大合樂音曲遠暢曲江漲水聯舟
數艘進士畢集蒙聞乃踰垣奔走羣衆愜望才登舟
移就水中畫舸平沉聲妓篙工不知紀極三十進士
無一生者

廣州錄事參軍柳慶獨居一室器用食物並致卧內
奴有私取塩一撮者慶鞭之見血

夏侯彪夏月食飲生虫在下未曾瀝口嘗送客出門
奴盜食臠肉彪還客覺之大怒乃捉蠅與食令嘔出
之

鄭仁凱爲密州刺史有小奴告以履穿凱曰阿翁爲
汝經營鞋有頃門夫着鞋者至凱廳前樹上有鴛窠
鴛啄木也遣門夫上樹取其子門夫脫鞋而緣之凱
令奴着鞋而去門夫竟至徒跣凱有德色

安南都護鄧祐韶州人家巨富奴婢千人恒課口腹
自供未曾設客孫子將一鴨私用祐以擅破家資鞭
二十

杭州刺史裴有敞疾甚令錢塘縣主簿夏榮看之榮
曰使君百無一慮夫人早須崇福以禳之崔夫人曰

禳須何物榮曰使君娶二姬以壓之出三年則危過矣夫人怒曰此獠狂語耳在身無病榮退曰夫人不信榮不敢言使君命合有三婦若不更娶於夫人不祥夫人曰乍可死此事不相當也其年夫人暴亡敞更娶二姓榮亦信矣

洛陽縣令宋之遜性好唱歌出爲連州叅軍刺史陳希古者庸人也令之遜教婢歌每日端笏立於庭中啣啣而唱其婢隔窻從而和之聞者無不大笑

北齊南陽王入朝上問何以爲樂王曰致嘍最樂遂收嘍一宿得五斗置大浴斛中一人脫衣而入被嘍齧死宛轉號叫苦痛不可言食頃而死帝與王坐看之

周嶺南首領陳元光設客令一袍袴行酒光怒令曳出遂殺之須臾爛煮以食客後呈其二手客懼攫喉而吐

周瀛州刺史獨孤莊酷虐有賊問不承莊引前曰若健兒一一具吐放汝遂還巾帶賊並吐之諸官以爲爲必放頃莊曰將我作具來乃一鐵鈎長丈餘甚鉅

利以繩掛於樹間謂賊曰汝不聞健兒鉤下死今以
胘鉤之遣壯士掣其繩則鉤出於腦矣謂司法曰此
法何似荅曰弔民伐罪深得其宜莊大笑後莊左降
施州刺史染病唯憶人肉部下有奴婢死者遣人割
肋下肉食之歲餘卒

周推事使索元禮時人號爲索使訊囚作鐵籠頭聲
呼角反其頭仍加楔焉多至腦裂髓出又爲鳳曬翅獼
猴鑽火等以椽閑手足而轉之並斫骨至碎又懸囚
於梁下以石縋頭其酷法如此元禮故胡人薛師之

假父後坐贓賄流死嶺南

周秋官侍郎周興推劾殘忍法外苦楚無所不爲時
人號牛頭阿婆百姓怨謗興乃榜門判曰被告之人
問皆稱枉斬決之後咸悉無言

周侍御史侯思止醴泉賣餅食人也羅告准例酌五
品於上前索御史上曰卿不識字對曰獬豸豈識字
但爲國觸罪人而已遂授之凡推勘殺戮甚衆更無
餘語但爲囚徒曰不用你書言筆語但還我白司馬
若不肯來俊卽與你孟青橫遭苦楚非命者不可勝

數白司馬坂者北邙山司馬坂也來俊者中丞來俊
臣也孟青者將軍孟青棒也後坐私蓄錦朝堂決殺
之

殿中侍御史王旭括宅中別宅女婦風聲色目有稍
不承者以繩勒其陰令壯士彈竹擊之酸痛不可忍
倒懸一女婦以石鎚其髮遣証與長安尉房恒姦經
三日不承女婦曰侍郎如此若毒兒死必訴於冥司
若配入宮必申於主上終不相放旭慙懼乃捨之

監察御史李嵩李全交殿中王旭京師號爲三豹嵩

爲赤鬣豹交爲白額豹旭爲黑豹皆狼戾不軌鳩毒
無儀體性狂疎精神慘刻每訊囚必鋪棘卧體削竹
籤指方梁壓髀碎瓦搯膝這仙人獻果玉女登梯犢
子懸駒驢兒拔橛鳳凰晒翅獼猴鑽火上麥索下闌
單人不聊生囚皆乞死肆情鍛鍊証是爲非任意指
麾傳空爲實周公孔子請伏殺人伯夷叔齊求其劫
罪訊劾乾溼水必有期推鞠濕泥塵非不久來俊臣
乞爲弟子索元禮求作門生被追者皆相謂曰牽牛
付虎未有出期縛鼠與猫終無脫日妻子永別友朋

長辭京中人相要作呪曰若違心負教橫遭三豹其
毒害也如此

真臘國在驩州南五百里其俗有客設檳榔龍腦香
蛤屑等以爲賞宴其酒比之淫穢私房與妻共飲對
尊者避之又行房不欲令人見此俗與中國同國人
不着衣服見衣服者共笑之俗無塩鐵以竹弩射虫
鳥

五溪蠻父母死於村外閣其屍三年而葬打鼓路歌
親屬飲宴舞戲一月餘日盡產爲棺餘臨江高山半
肋鑿龕以葬之自山上懸索下樞彌高者以爲至孝
卽終身不復祠祭初遭喪三年不食塩

嶺南獠民好爲蜜唧卽鼠胎未瞬通身赤蠕者飼之
以蜜釘之筵上嘖嘖而行以筯挾取啖之唧唧作聲
故曰蜜唧

天后中成王千里將一虎子來宮中養損一宮人遂
令生餓數日而死天后令葬之其上起塔設千人供
勒碑號爲虎塔至今猶在

袁守一性行淺促時人號爲料鬪鳧翁雞任萬年尉

雍州長史竇懷貞每欲鞭之乃於中書令宗楚客門
餉生菜除監察懷貞未知也貞高揖曰駕欲出公作
如此檢校守一卽彈之月餘貞除左臺御史大夫守
一請假不改出乞解貞呼而慰之守一兢惕不已楚
客知之爲除右臺侍御史於朝堂抗衡於貞曰與公
羅師羅師者市郭兒語無交陟也無何楚客以反誅
守一以其黨亂流端州

尚書右丞陸餘慶轉洛州長史其子嘲之曰陸餘慶
筆頭無力背頭硬一朝受詞詔十日判不竟送案褥
下餘慶得而讀之曰必是那狗遂鞭之

周定州刺史孫彥高被突厥圍城數十重不敢詣聽
文符須徵~~者~~者於小窻接入鎖州宅門及賊登壘乃
入匱中藏令奴曰牢掌鑰匙賊來索慎勿與昔有愚
人人京選皮袋被賊盜去其人曰賊偷我袋將終不
得我物用或問其故荅曰鑰匙尚在我衣帶上彼將
何物開之此孫彥高之流也

岐王府參軍石惠恭與監察御史李全交詩曰御史
非長任參軍不久居待君遷轉後此職還到余因競

朝野僉載 卷之六
放牒往來全交爲之判十餘紙以報乃假手於拾遺
張九齡

王怡爲中丞憲臺之穢姜晦爲掌選侍郎吏部之穢
崔泰之爲黃門侍郎門下之穢號爲京師三穢
陽滔爲中書舍人時促命制敕令史持庫鑰他適無
舊本檢尋乃斷窻取得之時人號爲斷窻舍人
杭州參軍獨孤守忠領租船赴都夜半急追集船人
更無他語乃曰逆風必不得張帆衆大哂焉

王熊爲澤州都督府法曹斷掠糧賊惟各決杖一百
通判熊曰總掠幾人法曹曰掠七人熊曰掠七人合
決七百法曹曲斷府司科罪時人哂之前尹正義爲
都督公平後熊來替百姓歌曰前得尹佛子後得王
癩癩判事驢咬瓜喚人牛嚼沫見錢滿面喜無錙從
頭啣嘗逢餓夜又百姓不可活

滑州靈昌尉梁士會官科烏翎里正不送舉牒判曰
官喚烏翎何物里正不送烏翎佐使曰公大好判烏
翎太多會索筆曰官喚烏翎何物里正不送烏翎有
識之士聞而笑之

滄州弓高鄧廉妻李氏女嫁未周年而廉卒李年十八守志設靈几每日三上食臨哭布衣蔬食六七年忽夜夢一男子容止甚都欲求李氏爲偶李氏睡中不許之自後每夜夢見李氏竟不受以爲精魅書符呪禁終莫能絕李氏嘆曰吾誓不移節而爲此所撓蓋吾容貌未衰故也乃拔刀截髮麻衣不濯蓬髻不理垢面灰身其鬼又謝李氏曰夫人竹栢之操不可奪也自是不復夢見郡守旌其門閭至今尚有節婦里

隋開皇中京兆韋袞有奴曰桃符每征討將行有膽力袞至左衛中郎以桃符又從驅使乃放從良桃符家有黃牯宰而獻之因問袞乞姓袞曰止從我姓爲韋氏符叩頭曰不敢與郎君同姓袞曰汝但從之此有深意故至今爲黃犢子韋卽韋庶人其後也不許異姓者蓋慮年代深遠子孫或與韋氏通婚此其意也

薛季昶爲荊州長史夢貓兒伏卧於堂限上頭向外以問占者張猷猷曰貓兒者爪牙伏門限者闔外之

朝野僉載 卷之八
事君必知軍馬之要未旬日除桂州都督嶺南招討使

洛州杜玄有牛一頭玄甚憐之夜夢見其牛有兩尾以問占者李仙藥曰牛字有兩尾失字也經數日果失之

明崇儼有術法大帝試之爲地窖遣妓奏樂引儼至謂曰此地常聞絃管是何祥也卿能止之乎儼曰諾遂書二桃符於其上釘之其聲寂然上笑喚妓人問云見二龍頭張口向上遂怖惧不敢奏樂也上大悅

孝和帝令內道場僧與道士各述所能久而不決玄都觀葉法善取胡桃二升并殼食之並盡僧仍不伏法善燒一鐵鉢赫赤兩手欲合老僧頭上僧唱賊袈裟掩頭而走孝和撫掌大笑

歐陽通詢之子善書瘦怯於父常自矜能書必以象牙犀角爲筆管狸毛爲心覆以秋兔毫松烟爲墨末以麝香紙必須堅薄白滑者乃書之蓋自重其書薛純陀亦效歐陽草傷於肥鈍亦通之亞也

宗楚客造一宅新成皆是文栢爲梁沉香和紅粉以

泥壁開門則香氣蓬勃磨文石爲階砌及地着告莫
鞞者行則仰什楚客被建昌王推得賍萬餘貫兄弟
配流太平公主就其宅看嘆曰看他行坐處我等虛
生浪死一年追入爲鳳閣侍郎景龍中爲中書令韋
氏之敗斬之

洛州昭成佛寺有安樂公主造百寶香爐高三尺開
四門絳橋勾欄花草飛禽走獸諸天妓樂麒麟鸞鳳
白鶴飛仙絲來線去鬼出神入隱居鈿鏤窈窕便娟
真珠瑪瑙瑠璃琥珀玻璃珊瑚瓊瑤璇璣一切寶貝
用錢三萬府庫之物盡於是矣

襄州胡延慶得一龜以丹漆書其腹曰天子萬萬年
以進之鳳閣侍郎李昭德以刀刮之並盡奏請付法
則天曰此非惡心也捨而勿問

則天好禎祥拾遺朱前疑說夢云則天髮白更黑齒
落更生卽授都官郎中司刑事囚三百餘人秋分後
無計可作乃於園獄外羅墻角邊作聖人跡長五尺
至夜半三百人一時大叫內使推問云昨夜有聖人
見身長三丈面作金色云汝等並冤枉不須怕惧天

子萬年卽有恩赦放汝把火照之見有巨跡卽大赦
天下改爲大足元年
滄州南皮縣丞郭務靜初上典王慶通判稟靜曰爾
何姓慶曰姓王須臾慶又來又問何姓慶又曰姓王
靜怪愕良久仰看慶曰南皮佐史總姓王
滕王嬰蔣王暉皆不能廉慎大帝賜諸王名五王不
及二王敕曰滕叔蔣兄自解經紀不勞賜物與之以
爲錢貫二王大慙朝官莫不自勵皆以取受爲贓污
有終身爲累莫敢犯者

益州新昌縣令夏侯彪之初下車問里正曰雞卵一
錢幾顆曰三顆彪之乃遣取十千錢買三萬顆謂里
正曰未須要且寄母雞抱之遂成三萬頭雞經數月
長成令縣吏與我賣一雞三十錢半年之間成三十
萬又問竹筍一錢幾莖曰五莖又取十千錢付之買
得五萬莖謂里正曰吾未須要筍且向林中養之至
秋竹成一莖十錢成五十萬其貪鄙不道皆類此
洛州司僉嚴昇期攝侍御史於江南巡察性嗜牛肉
所至州縣烹宰極多事無大小入金則弭凡到處金

銀爲之踊貴故江南人謂爲金牛刺史

張昌儀爲洛陽令借易之權勢屬官無不允者風聲鼓動有一人姓薛資金五十兩遮而奉之儀領金受其狀至朝堂付天官侍郎張錫數日失狀以問儀儀曰我亦不記得有姓薛者卽與錫檢業內姓薛者六十餘人並令與官其蠹政也如此

隋牛弘爲吏部侍郎有選人馬敞者形貌最陋弘輕之側卧食果子嘲敞曰嘗聞扶風馬謂言天上下今見扶風馬得驢亦不假敞應聲曰嘗聞隴西牛千石

不用鞫今見隴西牛卧地打草頭弘驚起遂與官

唐高士廉選其人齒高有選人自云解嘲譏士廉時着木履令嘲之應聲云刺鼻何曾嚏踏面不知瞋高生兩個齒自謂得勝人士廉笑而引之

周張元一腹麤而脚短項縮而眼跌吉項目爲逆流蝦蟆

唐姜晦爲吏部侍郎眼不識字手不解書濫掌銓衡曾無分別選人歌曰今年選數恰相當都由座主無文章案後一腔凍猪肉所以名爲姜侍郎

唐王及善才行庸猥風神鈍濁爲內史時人號爲鳩
集鳳池俄遷文昌右相無他政但不許令史雙驢入
臺終日迫逐無時暫舍時人號爲驅驢宰相

周張衡令史出身位至四品加一階合入三品已團
甲因退朝路旁見蒸餅新熟遂市其一馬上食之彼
御史彈奏則天乃降敕流外出身不許入三品遂落

甲

蘓頌年五歲裴談過其父頌方在乃試誦庾信枯樹
賦將及終篇避談字因易其韻曰昔年移樹依依漢

陰今看搖落悽悽江濤樹猶如此人何以任談駭嘆
久之知其他日必主文章也

通川界內多獺各有王養之並在河側岸間獺若入
穴插雉尾於獺穴前獺卽不敢出去却尾卽出取得
魚必須上岸人便奪之取得多然後放令自喫喫飽
卽鳴杖以驅之還插雉尾更不敢出

垂拱年則天監國羅織事起湖州佐史江琛取刺史
裴光判書割字合成文理詐爲徐敬業反書以告差
使推光欵書是光書欵語非光語前後三使推不能

決敕令差能推事人勘當取實僉曰張楚金可乃使
之楚金憂悶仰卧西窻日高向看之字似補作平看
則不覺向日則見之令喚州官集索一甕水令琛投
書於水中字一一解散琛叩頭伏罪敕令決一百然
後斬之賞楚金絹百疋

元嘉少聰俊左手書方口誦經史目數羣
羊兼成四十字詩一時而就足書五言一絕六事齊
舉代號神仙童子

刑部尚書李日知自爲畿赤不曾打杖行罰其事亦

濟及刑部尚書有令史受敕三日忘不行者尚書索
杖剝衣喚令史總集欲決之責曰我欲笞汝一頓恐
天下人稱你云撩得李日知嗔喫李日知杖你亦不
是人妻子亦不禮汝遂放之自是令史無敢犯者設
有稽失衆共謫之

王沂者平生不解絃管忽且睡至夜乃寤索琵琶絃
之成數曲一名雀啁蛇一名胡王調一名胡瓜苑人
不識聞聽之者莫不流淚其妹請學之乃教數聲須
臾總忘不復成曲

道士史崇玄懷州河內縣縫靴人也後度爲道士僑
假人也附太平爲太清觀王金仙玉真出俗立爲尊
師每入內奏請賞賜甚厚無物不賜授鴻臚卿衣紫
羅褐帔握象笏佩魚符出入禁闈公私避路神武斬
之京中士女相賀

嶺南風俗家有人病先殺雞鵝等以祀之將爲修福
若不差卽次殺猪狗以祈之不差卽次殺太牢以禱
之更不差卽是命不復更祈死則打鼓鳴鐘於堂比
至葬訖初死且走大叫而哭

景龍中瀛州進一婦人身上隱起浮圖塔廟諸佛形
像按察使進之授五品其女婦留內道場逆韋死後
不知去處

景雲中西京霖雨六十餘日有一胡僧名寶嚴自云
有術法能止雨設壇塲誦經呪其時禁屠宰寶嚴用
羊二十口馬兩匹以祭祈請經五十餘日其雨更盛
於是斬逐胡僧其雨遂止

則天時調猫兒與鸚鵡同器食命御史彭先覺監遍
示百官及天下考使傳看未遍猫兒飢遂齧殺鸚武

以餐之則天甚愧

逆韋之妹馮太和之妻號七姨信邪見豹頭枕以辟邪白澤枕以去魅作伏熊枕以爲宜男太和死嗣虢王娶之韋之敗也虢王斫七姨頭送朝堂則知辟邪之枕無効矣

滄州東光縣寶觀寺常有蒼鶻集重閣每有鶻數千鶻冬中每夕取一鶻以暖足至曉放之而不殺自餘鷹鶻不敢侮之

太宗養一白鶻號曰將軍取鳥常驅至於殿前然後擊殺故名落鴈殿上恒令送書從京至東都與魏王仍取報日徃反數廻亦陸機黃耳之徒歟

吏部侍郎鄭愔初託附來俊臣俊臣誅卽託張易之易之被戮託韋庶人後附譙王竟被斬

天后內史宗楚客性諂佞時薛師有嫪毒之寵遂爲作傳二卷論薛師之勝從天而降不知何代人也釋迦重出觀音再生期年之間位至內史

敬宗時高崔巍喜弄癡大帝令給使撩頭向水下良久出而笑之帝問曰見屈原云我逢楚懷王無道乃

沉汨羅水汝逢聖明主何爲來帝大笑賜物百段
秋官侍郎狄仁傑朝秋官侍郎盧獻曰足下配馬乃
作驢獻曰中劈明公乃成二犬傑曰狄字犬傍火也
獻曰犬邊有火乃是煮熟狗

安南武平縣封溪中有猩猩焉如美人解人語知往
事以嗜酒故以屐得之檻百數同牢欲食之衆自推
肥者相送流涕而別時餉封溪令以杷蓋之令問何
物猩猩乃籠中語曰唯有僕并酒一壺耳令笑而愛
之養畜能傳送言語人不如也

彭博通者河間人也身長八尺曾於講堂堦上臨堦
而立取鞋一輛以臂夾令有力者後拔之鞋底中斷
博通脚終不移牛駕車正走博通倒曳車尾却行數
十步橫拔車轍深二尺餘皆縱橫破裂曾遊瓜埠江
有急風張帆博通捉尾纜挽之不進

真觀中恒州有彭闢高瓚二人闢豪時於大鬴塲上
兩朋竟勝闢活捉一豚從頭齧至項放之地上仍走
瓚取猫兒從尾食之腸肚俱盡仍鳴喚不止闢於是
手帖然心伏

巧人張崇者能作灰畫腰帶鉸具每一勝大如錢灰畫燒之見火卽隱起作龍魚鳥獸之形莫不悉備

則天如意中海州進一匠造十二辰車廻轅正南則午門開馬頭人出四方廻轉不爽毫厘又作木火通鐵盞盛火晨轉不翻

洛州殷文亮曾爲縣令性巧好酒刻木爲人衣以繒綵酌酒行觴皆有次第又作妓女唱歌吹笙皆能應節飲不盡卽木小兒不肯把飲未竟則木妓女歌管連理催此亦莫測其神妙也

將作大匠楊務廉甚有巧思常於沁州市內刻木作僧手執一椀自能行乞椀中錢滿關鍵忽發自然作聲云布施市人競觀欲其作聲施者日盈數千矣
郴州刺史王琚刻木爲獺沉於水中取魚引首而出蓋獺口中安餌爲轉關以石繩之則沉魚取其餌關卽發口合則嚙魚石發則浮出矣
薛賚惑者善投壺龍躍隼飛矯無遺箭置壺於背後却反矢以投之百發百中

越州兵曹柳崇忽瘍生於頭呻吟不可忍於是召術

朝野僉言 二十三
士夜觀之云有一婦女綠裙問之不應在君窻下急
除之崇訪窻下止見一瓷妓女極端正綠瓷爲飾遂
於鐵臼擣碎而焚之瘡遂愈

張易之初造一大堂甚壯麗計用數百萬紅粉泥壁
文栢帖柱琉璃沉香爲飾夜有鬼書其壁曰能得幾
時令削去明日復書之前後六七易之乃題其下曰
一月卽足自是不復更書經半年易之藉没入官

梁簡文之生誌公謂武帝曰此子與寃家同年生其
年侯景生於鴈門亂梁誅蕭氏畧盡

周苴子布博學有才年十七爲左衛長史不入五品
登封年病以驢輦彊至獄下天恩加兩階合入五品
竟不能起鄉里親戚來賀衣冠不得遂以緋袍覆其
上帖然而終

唐國史補

唐 李肇

乳兒子

元魯山自乳兒子數日兩乳湮流兒子能食其乳方止

獻文

崔顥有美名李邕欲一見開館待之及顥至獻文首章曰十五嫁王昌邕叱起曰小子無禮乃不接之著六說

唐國史補 一
劉迅著六說以探聖人之旨唯說易不成行於代者
五篇而已識者伏其精峻

獻獅子

開元末西國獻獅子至長安西道中繫於驛樹樹近
井獅子哮吼若不自安俄頃風雷大至果有龍出井
而忞

偽書

天寶中天下屢言聖祖見因以四子列學官故有偽
爲庚桑子者其辭鄙俚非聖賢書

翫錦鞞

貴妃縊於馬嵬梨樹下店媪收得錦鞞一隻相傳過
客每一借翫必須百錢媪因至富

問疾

韋陟有疾房太尉使子弟問之延入卧内行步悉藉
茵毯房氏子弟襪而後登侍婢皆笑舉朝以韋氏貴
盛房氏清儉俱爲美談

萬里橋

蜀郡有萬里橋玄宗至而喜曰吾常自知行地萬里

則歸

求音樂

李翰文雖宏暢而思甚苦澀晚居陽翟常從邑令皇甫曾求音樂思涸則奏樂神全則綴文

投犀象

李沂公勉爲嶺南節度使罷鎮行到石門停舟悉搜家人犀象投於江中而太

破賊

袁傜之破袁晁擒其僞公卿數十人州縣大具桎梏

謂必生致闕下傜曰此惡百姓何足煩人乃各遣笞臀而釋之

綠幢歌

元載擅權累年客有爲都盧綠幢歌諷其至危之勢載覽而泣下

李馬不叶

初馬司徒面雪李懷光德宗正色曰唯卿不合雪人惶恐而退李令聞之請全軍自備資糧以討凶逆由此李馬不叶

鵲喜

竇參之敗給事中竇申止於配流德宗曰吾聞申欲至人家謂之鵲喜遂賜死

繫祖

馬司徒孫始生德宗命之曰繼祖退而笑曰此有二義意謂以索繫祖也

裂麻

陽城爲諫議大夫德宗欲用裴延齡爲相城曰白麻若出吾必裂之而死德宗聞之以爲難竟寢之

畫鵬

裴延齡恃恩輕噪班列懼之唯顧少連不避延齡嘗畫一鵬羣鳥噪之以獻上上知衆怒如是竟不用

加糧

貞元十五年討吳少誠始令度支供諸道出界糧元和十年又加其數矣

兄弟優劣

穆氏兄弟四人贊質員賞時人謂贊俗而有格爲酪質美而多入爲酥員爲醍醐言粹而少用賞爲乳腐

唐國史補
言最凡固也

白方

國子司業韋聿臯之兄也中朝以爲戲弄嘗有人言九宮休咎聿曰我家白方常在西南二十年矣

傲毀

吳人顧况詞句清絕雜之以詼諧尤多輕薄爲著作郎傲毀朝列貶死江南

惡詩

杜太保在淮南進崔叔清詩百篇德宗謂使者曰此

惡詩焉用進時呼爲准敕惡詩

好奇

韓愈好奇與客登華山絕峯度不可返乃作遺書發狂慟哭華陰令百計取之乃下

山陵

京輔故老言每營山陵封輒雨至少霖靈亦十餘日矣

策杖入府

李遜爲衢州刺史以侯高試守縣令高策杖入府以

唐國史補
議百姓亦近代所難也

太玄經

王相注太玄經常取以卜自言所中多於易筮

宰臣錄

蔣乂撰宰臣錄每拜一相旬月必獻一卷故得物議所嗤

尚牡丹

京城貴遊尚牡丹三十餘年矣每春暮車馬若狂以不恥翫爲耻執金吾鋪官園外寺觀種以求利一本

有直數萬者

判事

宰相判四方之事有堂案處分百司有堂帖不次押名曰花押黃勅旣行下有小異同日帖黃一作押黃參酌院

長慶初上以刑法爲重每有司斷大獄又令中書舍人一員參酌而出之百司呼爲參酌院

賜紫

貞元末有郎官四人自行軍司馬賜紫而登郎署省

唐國史補
中謔爲四軍紫

惜福

肅宗爲太子上使割羊臙以餅餽办徐噉之上喜曰
福祿當如是愛惜

給公券

寶應二年大夫嚴武奏在外新除御史食宿私舍非
宜自此乃給公券

寫書

張參爲國子司業年老常手寫九經以謂讀書不如

寫書

知音

宋沆爲太樂令知音近代無比太常久亡徵調沆乃
考鍾律而得之

唐關史

唐 吳兢

蘭陵公

丞相蘭陵公素蕭傲清譽儉德時所推伏嘗統戎于
番禺有酌泉投香之譽以是夷估輻湊至於長安寶
貨藥肆咸豐衍於南方之物由此人情歸美僖宗誕
聖于壬午龍飛於癸巳皇筭十有二載矣思命耆德
佑佐大化乃自奉常卿起爲上相時年八十有三居
台席數載汲引才俊導暢皇慈儉德旣彰澆風少革

唐隱居
及薨于位上甚追悼而廢常朝者三日冊贈之禮有加等焉議者曰高位重祿苟有其分陰靈必助其壽考不然安有過懸車之歲而命相之主始生也太公晚年七十而遇文王今逾釣渭之年一紀則知榮辱之分豈偶然哉

裴休

裴休尚古好奇掌綸誥日有親表調授邑宰於曲阜者土人墾田得古器曰盎腹容三斗淺項痺足規口短耳朴素古醜將蠹土壤者既洗滌之後磨礱之隱

隱有古篆九字帶盎之腰曲阜令不能辯兗州有書生姓魯能八體書字者召至于邑出盎示之曰此大篆也非今之所行者雖某頗嘗學之是九字曰齊桓公會于葵丘歲鑄邑宰大奇其說及以篆驗則字勢存焉及輦致河東公之門公以爲麟經時物得以言古矣寶之猶鍾珉郜鼎也視草之暇輒引親友之分深者觀之以是京華聲爲至寶公後以小宗伯賞貢舉生徒有以盜寶爲請者裴公一日設食會門弟子出器於庭則離立環觀迭詞以質獨劉舍人蛻以爲

非當時之物近世矯作也公不悅曰果有說乎紫微曰某劄專丘明之書且載小白桓公九合諸侯取威定霸葵丘之會第八盟又按禮經諸侯五月而葬同盟至既葬然後反虞虞然後卒哭卒哭然後定謚則葵丘之役實在生前不得以謚稱此乃近世矯作也裴公洗然而悟命擊碎然後舉爵盡飲而罷

許道敏

許道敏隨鄉薦之初獲知於時相是冬主文者將蒞事於貢院謁於相門相大稱其卓苦藝學宜在公選

主文受命而去許潛知其旨則磨礪以須屈指試期大掛人口俄有張希復員外結婚於丞相竒章公之門親迎之夕辟道敏爲僮道敏乘其喜氣縱酒飛章搖颯高譚極歡而罷無何時相敷奏不稱旨移秩他郡人情恐異主文不敢第於甲乙自此晦昧墮坎不復振舉繼丁家故乖二十載至大中六年崔璵知舉方擢於上科時有同年張讀一舉成事年十有九乃道敏敗於垂成之冬僮導張希復之子牛夫人所生也

鄭畋

馬嵬佛堂楊妃縊所邇後才士經過賦詠以道其幽怨者不可勝紀皆以翠翹香鈿委於塵泥紅淒碧怨令人傷悲雖調古詞清無逃此意也丞相鄭畋爲鳳翔從事口題詩曰肅宗迴馬楊妃死雲雨雖亡日月新終是聖朝天子事景陽宮井又何人觀者以爲眞輔國之句

法軌

名僧法軌形容短小開講於寺與李榮議論往來數

番僧舊作一詩詠李榮於高坐上誦之云姓李應須禮名榮又不榮李應聲曰身長三尺半頭毛尤未生四坐伏其辯捷

唐語林

唐 王讜

德行

姚崇每與兒孫會集曰外甥自非疏但別姓耳遣與兒姪連名

開元天寶間傳家法者崔沔之家學崔均之家法
肅宗爲太子嘗侍膳尚食置熟俎有羊臂臠上顧太子使太子割肅宗旣割餘汚漫亦以餅潔之上熟視不憚肅宗徐舉餅啖之上大悅謂太子曰福當如是

唐言本
愛惜

李師古跋扈憚黃門爲相未敢失禮乃寄錢物百萬并轎車一乘使者未敢進乃於宅門伺候有肩輿自宅出從婢二人青衣縵縷問何人曰相公夫人使者遽歸以告師古乃止

路相隨幼孤其母問汝識汝父否曰不識母曰正如汝面也隨號絕久之終身不照鏡李衛公慕其淳素篤行結爲親家以女適路氏

元魯山自乳兄子兩乳潼流能食乃止

言語

陳子曰衛公之戰伐無兵也杜員外詠歌無詩也張長史草聖無書也

陸長源以舊德爲宣武軍行司馬韓愈爲巡官或譏年輩相懸周原曰大虫老鼠俱爲十二相屬何怪之有旬日傳於長安中

高貞公爲中書舍人九年家無制草或曰前輩有製集焚之何也答曰王言不可存於私家

政事

顏魯公真卿爲監察御史克河西隴右軍試覆屯交
兵馬使五原早有冤獄決乃兩郡人呼御史雨
李封爲延陵令吏人有罪不加杖罰但令裹碧頭巾
以辱之隨所犯輕重以日數爲等級日滿乃釋吳人
著此服出入州鄉以爲大耻皆相勸勵無敢犯賦稅
常先諸縣旣去官竟不捶一人

宣宗每行幸內庫以紫衣金魚朱衣銀魚三二副隨
駕或半年或終年不用一副當時以得朱紫爲榮

太宗閱醫方見明堂圖人五臟之系咸附於背乃愴

然曰今律杖笞背奈何髀背分受乃詔不得笞背

文學

楊京兆兄弟皆能文爲學甚苦或同賦一篇共坐庭
石霜積襟袖課成乃已

張弘靖十二世掌書命至丞相楊巨源贈公詩云伊
陟無聞祖韋賢不利孫當時稱其能與張氏說家門
巨源在元和詩韻不爲新語體律務實功夫頗深自
旦至暮吟詠不輟年老頭數搖人言吟詩多所致
李益詩名早著征人歌一篇好事者盡爲圖障回樂

烽前沙雪天下唱爲歌曲

或有朝客譏宋濟曰近日白袍子何太紛紛濟曰蓋因緋袍子紫袍子紛紛使然也

方正

裴光庭累典名藩皆有異政玄宗謂宰相曰裴光庭姓好惡如扇驅蚊蚋焉

韓愈病將卒召群僚曰吾不藥今將病死矣汝詳視吾手足支體無誑人云韓愈癩死也

太宗得鷄子俊異私自臂之望見魏公乃藏于懷公

知之遂前白事因話自古帝王逸豫微以爲諷上惜鷄子恐死而又素嚴憚徵欲盡其言徵語愈久鷄竟死懷中

雅量

裴相垙嘗應宏詞崔樞考之不第及爲相擢之爲禮部侍郎笑曰此報德也樞惶恐欲墜階又笑曰戲言也

長慶初趙相爲太常卿贊郊廟之禮時罷相二十餘年年七十六衆服其健右常侍郎孝亦笑曰是僕爲

東府試官所送進士也

識鑿

王瑀爲太常卿早起聞永興里人吹笛問是太常樂人否果是已後因閱樂而撻之問曰何得罪曰卧吹笛又見康崑崙彈琵琶云琵琶聲多琵琶聲少亦未可彈五十四絲大絃也自下而上謂之琵琶自上而下爲之琵琶

閩州得玉磬十二以獻張率更叩其一日是晉某歲所造也是歲餘月造磬者法月數有十三今聞其一宜於黃鍾九尺掘之必得焉勅州求之如言而得

賞譽

正觀中蜀人李義甫八歲以神童至京師太宗在上林苑便對有得鳥者上賜義甫義甫登時進詩曰日裏揚朝彩琴中伴夜啼上林多許樹不借一枝棲上笑曰朕今以全樹借汝後相高宗大中末諫官獻疏請賜白居易謚上曰何不讀醉吟先生墓表卒不賜謚弟敏中在相位奏立神道碑使李商隱爲之

規箴

太宗常幸洛陽頗見可欲多治隋氏舊宮或縱畋遊
魏徵驟諫上忻然罷曰非公無此語

夙慧

太宗令虞監寫列女傳以裝屏風未及閱卷乃闔書
之一字無失

玄宗爲潞州別駕入覲京師尤自卑損暮春豪家子
數輩游昆明池方飲次上戎服臂鷹疾驅至前諸人
不悅忽一少年持酒船倡曰今日宜以門族官品自

言酒至上大聲曰魯祖天子祖天子父相王臨淄王
李某諸少年驚走不敢復視乃連飲三銀船盡一巨
餽乘馬而去

玄宗性俊邁不好琴會聽琴正弄未畢叱琴者曰待
詔出謂內官曰速令花奴將羯鼓來爲我解穢

容止

開元中燕公張說當朝文伯冠服以儒者自處玄宗
嫌其異已賜內樣巾子長脚羅幘頭燕公服之入謝
玄宗大喜玄宗早朝百官趨班上見張九齡風儀秀

整有異於衆謂左右曰朕每見張九齡精神頓生
李相國祥爲翰林學士以階前日影爲入侯公性懶
每入必逾八磚後號爲八磚學士

魏僕射元忠每立朝必得常處人或記之不逾尺寸

企羨

陽城爲朝士家苦貧常以衾木枕質錢數萬人爭取
之

李相宗閔知貢舉門生多清雅俊茂唐冲薛庠袁都
時謂之玉笋

東夷有識山川者徧禮五岳一拜而退惟入關望華
山自關西門步步拜禮至山下仰望歎詫七日而去
謂京師衣冠文物之盛由此而至

咸通末鄭渾之爲蘇州錄事談銖爲醴院官鍾輻爲
院巡儀廣文時湖州牧李超趙蒙相次俱狀元二郡
地土相接時爲語曰湖接兩頭蘇連三尾

太宗謂梁公曰以銅爲鏡可以正衣冠以古爲鏡可
以知興替以人爲鏡可以明得失朕嘗保此三鏡用
防已過今魏徵殂逝一鏡亡矣

栖逸

江南多名僧貞元元和以來越州有清江清畫婺州有乾後乾輔時謂之會稽二清東陽二乾

崔趙公嘗問徑山曰弟子出家得否徑山曰出家是大丈夫事非將相所爲

韓愈好音嘗與客登華山絕頂度不可下返發狂慟哭爲遺書華陰令百計取之乃下

天寶之亂元結自汝墳率隣里南投襄漢保全者千餘家乃舉兵宛葉之間有城守扞寇之力結天寶中稱中行子始在商餘山自稱元子逃難入猗琅山或稱浪士漁者呼爲贅叟酒徒呼爲漫郎

大唐新語

唐 劉肅

匡贊

姚崇以拒太平公主出為申州刺史玄宗深德之大
 平既誅徵為同州刺史素與張說不叶說諷趙彥昭
 彈之玄宗不納俄校獵于渭濱密召會于行所玄宗
 謂曰卿頗知獵乎崇對曰此臣少所習也臣年三十
 居澤中以呼鷹逐兔為樂猶不知書張璟謂臣曰君
 當位極人臣無自弃也爾來折節讀書以至將相臣

少為獵師老而猶能玄宗大悅與之偕馬臂鷹遲速
在手動必稱旨玄宗懽甚樂則割鮮閑則咨以政事
備陳古今理亂之本土之可行者必委曲言之玄宗
心益開聽之疊疊忘倦軍國之務咸訪於崇崇罷冗
職修舊章內外有叙又請無赦宥無度僧無數遷吏
無任功臣以政玄宗悉從之而天下大理

開元

年加榮
二十三

王已下官勅宰臣入集賢院分寫告身

以賜之侍中裴耀卿因入書庫觀書既而謂人曰聖
上好文書籍之盛事自古未有朝宰充使學徒雲集

觀象設教盡在是矣前漢有金馬石渠後漢有蘭臺
東觀宋有總明陳有德教周則獸門麟趾北齊有仁
壽文林雖載在前書而事皆瑣細方之今日則豈得
扶翰捧轂者哉

規諫

太宗射猛獸於苑內有群豕突出林中太宗引弓射
之四發殪四豕有一雄豕直來衝馬吏部尚書唐儉
下馬搏之太宗拔劍斷豕顧而笑曰天策長史不見
上將擊賊耶何懼之甚儉對曰漢祖以馬上得之不

以馬上理之陛下以神武定四方豈復逞雄心於一獸太宗善之因命罷獵

太宗嘗罷朝自言殺却此田舍漢文德皇后問誰觸忤陛下太宗曰魏徵每庭辱我使我常不得自由皇后退朝服立於庭太宗驚曰何爲若是對曰妾聞主聖臣忠今陛下聖明故魏徵得盡直言妾備後宮焉敢不賀於是太宗意乃釋

谷邠律貞觀中爲諫議大夫褚遂良呼爲九經庫永徽中嘗從獵途中遇雨高宗問雨衣若爲得不漏邠律曰能以瓦爲之不漏也意不爲畋獵高宗深賞焉賜邠律絹帛二百疋

公直

陸德明受學於周弘正善言玄理王世克僭號署爲散騎侍郎王令子師之將行束修之禮德明服巴豆散卧東壁下克之子入跪床下德明佯給之痢竟不與語遂移病成畢及入朝太宗引爲文館學士使闡立本寫真形褚亮爲之讚曰經術爲貴玄風可師勵學非遠通儒在茲終於國子博士

文德皇后崩未除喪許敬宗以言笑獲譴及太宗梓宮在前殿又垂臂過侍御史間玄正彈之曰敬宗往居先后喪已坐言笑譴今對大行梓宮又垂臂無禮敬宗懼獲罪高宗寢其奏事雖不行時人重其剛正劉仁軌爲左僕射暮年頗以言詞取悅訴者戶部員外魏克已斷案多爲仁軌所異同克已執之曰異方之樂不入人心秋蟬之聲徒聒人耳仁軌怒焉罵之曰癡漢克已俄遷吏部侍郎

景龍中中宗嘗遊興慶池侍宴者遞起歌舞并唱迴波詞方便以求官爵給事中李景伯亦起舞歌曰迴波詞持酒卮微臣職在箴規侍宴旣過三爵誼誼竊恐非儀於是宴罷

清廉

楊嶠爲祭酒謂人曰吾雖三品非不榮貴意常不逾疇昔一尉也時議重之嶠祖父休之事北齊執政將封爲王以寵之休之固辭而謂人曰我非奴非獠何事封王耶

李日知爲侍中頻乞骸骨詔許之初日知將欲陳請

不與妻謀及還飾裝將出居別業妻驚曰家室屢空子弟名宦未立何爲辭職也日知曰書生至此已過分人情無厭若恣其心是無止足也

持法

李日知爲司刑丞嘗免一死囚少卿胡元禮異判殺之與日知往復至于再三元禮怒遣府吏謂曰元禮不離刑曹此囚無活法日知報曰日知不離刑曹此囚無死法竟以兩聞日知果直

高宗朝司農寺欲以冬藏餘菜出賣與百姓以墨勅示僕射蘇良嗣良嗣判之曰昔公儀相魯猶拔去園葵况臨御萬乘而賣鬻蔬菜事遂不行

節義

高祖命屈突仲通副太宗討王世充時通二子俱在充所高祖謂通曰東征之事今且相屬其如兩子何通對曰臣以朽老誠不足當重任但自惟疇昔就執事豈以兩兒爲念兩兒若死自是其命終不以私害公也高祖歎息曰狗義之夫一至於此可尚也

教行

裴敬彝父知周爲陳國王典儀暴卒敬彝時在長安
忽涕泣謂家人曰大人必有痛處吾卽不安今日心
痛手足皆廢事在不測能不戚乎遂急告歸父果已
歿毀瘠過禮事以孝聞累遷吏部員外

識量

狄仁傑爲內史則天謂之曰卿在汝南甚有善政欲
知譖卿者乎仁傑謝曰陛下以臣爲過臣當改之陛
下明臣臣之幸也若臣不知譖者並爲友善臣請不
知則天深加歎異

容恕

崔善爲明天文曆筭曉達時務爲尚書左丞令史惡
其明察乃爲謗書曰崔子曲如鈞隨時待封侯高宗
謂之曰澆薄之後人多醜政昔北齊奸吏歌斛律明
月高緯闇主遂滅其家朕雖不明幸免斯事乃構流
言者罪之

裴玄本好諧謔爲戶部郎中時左僕射房玄齡疾甚
省郎將問疾玄本戲曰僕射病可須問之旣甚矣何
須問也有洩其言者旣而隨例候玄齡玄齡笑曰裴

郎中來玄齡不死矣

盧承慶爲吏部尚書總章初校內外官考有一官督
運遭風失米承慶爲之考曰監運損糧考中下其人
容止自若無一言而退承慶重其雅量改注曰非力
所及考中中旣無喜容亦無愧詞又改曰寵辱不驚
考中上衆推承慶之弘恕

聰敏

秦府倉曹李守素尤諳氏族時人號爲內譜虞世南
語人曰昔任彥昇善譚經籍稱爲五經笥今宜改倉

曹爲人物志

從善

魏徵嘗取還奏曰人言陛下欲幸山南在外裝束悉
了而竟不行何因有此消息太宗笑曰當時實有此
心畏卿嗔遂停耳

諛佞

成敬竒有俊才文章可立就爲大理正與姚崇有姻
親崇或寢疾敬竒造宅省焉對崇涕泣懷中置生雀
數頭乃一一持出請崇執手而後放之祝云願令公

大唐新語
速愈崇勉而從之敬竒旣出忿其諛媚謂子弟曰此
淚亦何從而來自茲不復接遇

大唐竒事

唐 馬總

管子文

李林甫爲相初年有一布衣詣謁之閹吏謂曰朝廷
新命相國大寮尚未敢及門何布衣容易謁之邪布
衣執刺待於路傍高聲自稱曰業八體書生管子文
欲見相國伸一言林甫召之於賓館至夜靜月下揖
之生日僕實老於書藝亦自少遊圖籍之圃嘗竊見
古昔興亡明主賢臣之事故願謁公以伸一言林甫

曰僕偶備位於輔弼實非才器已恐不勝大任福過
禍隨也君幸辱玉趾敢授教於君君其無惜藥石之
言以惠鄙人生曰古人不容易而談者益知談之易
聽之難也必能少覽容易之言爲不容易之聽則涓
塵皆可以裨海岳也况聖哲云一言可以興邦一言
可以喪邦公若聞一言卽欲奉而行之臨一事卽恣
心徇意如此則雖日納獻言之士亦無益也林甫乃
容恭意謹而言曰君但一言教僕僕當書紳而永爲
箴誠生曰君聞美言必喜聞惡言必怒僕以美言譽

君則無裨君之事以惡言諷君必犯君之顏色旣犯
君之顏色君復怒我卽不得盡伸惡言矣美言徇而
損惡言直而益君當悉察之容我之言勿復加怒林
甫不覺膝席而聽生曰君爲相相天子也相天子安
宗社保國也宗社安萬國寧則天子無事天子無事
則君之無事設或天下有一人失所卽罪在天子罪
在天子焉用君相夫爲相之道不必獨任天下事當
舉文治天下之民舉武定天下之亂則仁人撫疲瘵
用義士和鬪戰自修節儉以諷上以化下自守忠貞

以事主以律人固不暇躬勤庶政也庶政得人卽治
苟不得人雖才如伊呂亦不治噫相國慎之林甫聽
之駭然遽起拜謝之生又曰公知斯運之通塞邪林
甫曰君當盡教我我當終身不忘生曰大治生亂亂
生治今古不能易也我國家自革隋亂而治至於今
日亂將生矣君其記之林甫又拜謝至曙欲聞於上
縻以一爵祿令左右潛守之堅求退曰我本祇欲達
一言於公今得竭愚悃而又辱見納又何用阻野人
之歸也林甫堅畱之不得遂去林甫令人暗逐之生

至南山中一石洞其人尋亦入石洞遽不見生唯有
故舊大筆一其人攜以白林甫林甫以其筆置於書
閣焚香拜祝其夕筆忽化爲一五色禽飛去不知所
之

廉廣

廉廣者魯人也因採藥於泰山遇風雨止於大樹下
及夜半雨晴信步而行俄逢一人有若隱士問廣曰
君何深夜在此仍林下共坐語移時忽謂廣曰我能
畫可奉君法廣唯唯乃曰我與君一筆但密藏焉卽

大唐詩事 卷之七
隨意而畫當通靈因懷中取一五色筆以授之廣拜謝訖此人忽不見爾後頗有驗但祕其事不敢輕畫後因至中都縣李令者性好畫又知其事命廣至飲酒從容問之廣祕而不言李苦告之廣不得已乃於壁上畫鬼兵百餘狀若赴敵其尉趙知之亦堅命之廣又於趙廨中壁上畫鬼兵百餘狀若擬戰其夕兩處所畫之鬼兵俱出戰李及趙既見此異不敢畱遂皆毀所畫鬼兵廣亦懼而逃往下邳下邳令知其事又切請廣畫廣因告曰余偶夜遇一神靈傳得畫法

每不敢下筆其如往往爲妖幸恕之其宰不聽謂廣曰畫鬼兵卽戰畫物必不戰也因命畫一龍廣勉而畫之筆纔絕雲蒸霧起飄風倏至畫龍忽乘雲而上致滂沱之雨連日不止令憂漂壞邑居復疑廣有妖術乃收廣下獄窮詰之廣稱無妖術以雨猶未止令怒甚廣於獄內號泣追告山神其夜夢神人言曰君當畫一大鳥叱而乘之飛卽免矣廣及曙乃密畫一大鳥試叱之果展翅廣乘之飛遠而去直至泰山而下尋復見神謂廣曰君言泄於人間固有難厄也本

與君一小筆欲爲君致福君反自致禍君當見還廣
乃懷中揆筆還之神尋不見廣因不復能畫下邳畫
龍竟爲泥壁

王武

京洛富人王武者性苟且能媚于豪貴忽知有人貨
駿馬遂急令人多與金帛於衆中爭得之其馬白色
如一團美玉其鬃尾赤如朱皆言千里足也又疑是
龍駒馳驟之駛非常馬得及王武將以獻大將軍薛
公乃廣設以金鞍玉勒間之珠翠方伺其便達意也

其馬忽于廐中大嘶一聲後化爲一泥塑之馬立焉
武大驚訝遂焚毀之

三聖記

唐 李德裕

大聖祖玄元皇帝

有唐寶歷二年歲次丙午八月丙申朔十五日庚戌
玉清玄都大洞三道弟子正議大夫使持節潤州諸
軍事守潤州刺史兼御史大夫克浙西道都團練觀
察處置等使上柱國贊皇縣開國男食邑三百戶賜
紫金魚袋李德裕上爲九廟聖主次爲七代先靈下
爲一切含識於茅山崇元觀南敬造老君殿院及造

老君孔子尹真人像三軀皆按史籍遺文庶垂不朽
老君

按史記孔子適周將問禮於老子老子曰子所言者
其人與骨皆已朽矣獨其言在耳且夫君子得其時
則駕馭不得其時則蓬累而行吾聞之良賈深藏若
虛君子盛德容貌若愚去子之驕氣與多慾態色與
淫志是皆無益於子之身吾所告子若是而已孔子
去謂弟子曰鳥吾知其能飛魚吾知其能游獸吾知
其能走走者可以爲網游者可以爲綸飛者可以爲

矰至於龍吾不知其乘風雨而上天吾今日見老子
其猶龍耶

尹真人

按史記老子居周久之見周之衰乃遂去至關關令
尹喜曰子將隱矣疆爲我著書於是老子乃著書上
下篇言道德之意五千餘言而去列仙傳曰關令尹
喜者周大夫也喜內學星宿服精華隱德行仁時人
莫知也老子西遊喜先見其氣知真人當過物色而
迎之果得老子老子亦知其奇爲著書與老子俱之

三聖記
流沙西服巨勝寔莫知所終

先友記

唐 柳宗元

袁高河南人以給事中敢諫爭貞直忠蹇舉無與比
能使所居官大再贈至禮部尚書

姜公輔爲內學士以奇策取相位好諫諍免後以罪
貶爲復州刺史卒

齊映南陽人爲相以文敏顯用

嚴郢河南人剛厲好殺號忠能爲京兆河南尹御史
大夫善舉職爲邪險構扇以貶死

元全柔河南人氣象甚偉好以惠報怨恢然者也爲
大官有土地入爲太子賓客

杜黃裳京兆人弘大人也善言體要爲相有牆仞不
佞以謀克蜀加司空出爲河中節度

劉公濟河間人厚寬碩大與物無忤爲渭北節度入
爲工部尚書卒

楊氏兄弟者弘農人皆孝友有文章

憑由江南西道入爲散騎常侍

凝以兵部郎中卒

凌以大理評事卒最善文

程氏兄弟者河南人皆強毅仁孝

贊爲御史中丞捍佞倖得貶後至宣池歎處置使
卒

質爲尚書郎以侍御史內供奉卒最善文

皇甫政河南人有威儀由浙東廉使爲太子賓客

裴樞同郡人爲御史天子以隱罪誅吏樞頓首願白
其狀以故貶後爲尚書郎

李舟隴西人有文學俊辯高志氣以尚書郎使危疑

反側者再不辱命其道大顯被讒妒出爲刺史廢
痼卒

李鄴江夏人果檢自負疑然善爲官爲御史中丞京
兆尹鳳翔節度

梁肅安定人最能爲文以補闕修史侍皇太子卒贈
禮部郎中

陳京泗上人始爲諫官數諫諍有內行文多詰訓爲
給事中上方以爲相會惑疾自刃廢痼卒

韓會昌黎人善清言有文章名最高然以故多詢至

起居郎貶官卒

弟愈文益奇

許孟容吳人讀書爲文口辯爲給事中嘗論事由太
常少卿爲刑部侍郎

李覲隴西人行義甚修至刑部郎中卒故與先君爲
三司者也其大理者曰楊瑀瑀無可言猶以獄直
爲御史

宇文邈河南人有文謹慤人也爲御史中丞覲覲自
守然以直免官復爲刺史卒

袁滋陳郡人善篆書文敏不競爲相出使辱命貶刺史復爲義成軍節度卒

盧群范陽人雜博多所許與使反側之地天子以爲任事爲義成軍節度卒

崔損清河人畏慎爲相無所發明然不害物天子獨愛幸以損爲長者

鄭餘慶滎陽人再爲相始天下皆以爲長者及爲大官名益少今爲尚書河南尹無恙

鄭利用餘慶從父兄也真長者由大理少卿爲御史

中丞復由中丞爲大理少卿

李益隴西姑臧人風流有文詞少有僻疾以故不得用年老常望仕非其志復爲尚書郎

王紆其弟紹太原人紹得幸德宗爲尚書在宰相之右今爲徐泗節度紆爲學術魯直爲尚書郎

路泌河南人以尚書郎使西戎留戎中度今已年八十餘旣和戎十五年不得歸無爲言者

虞當會稽人爲郭尚父從事終沔州刺史以信聞賈弇長樂人善士也爲校書郎卒

弟全至御史中丞

趙需天水人嘒嘒儒士也有名至兵部郎中卒

張式南陽人

張莒常山人

張惟儉宣城當塗人皆善言謹式至河南尹莒鄧州

刺史惟儉和州刺史

奚陟江都人柔敏至吏部侍郎世謂陟善宦然其智足以自處也

盧景亮涿人有忠義多所激發爲諫官奏書如水赴

壑坐貶廢棄甚久至順宗時爲尚書郎升中書舍人卒

楊於陵弘農人善吏敏秀者也爲中書舍人京兆尹

張因某人舉詔策爲長安尉願去官爲道士甚有名

與其弟回降封州曰吾老矣必死回也哭而行遂

死封州

高郢渤海人有文章規矩自立者不干貴幸以太常爲相罷居尚書

唐次北海人有文章學行義甚高以尚書郎出爲刺

先友言
史屏棄永貞中召以爲中書舍人道病去長安七
十里死傳舍

苗拯上黨人有學術峭直以諫議大夫漏泄省中語
貶萬州卒

柳氏兄弟者先君族兄弟也最大弁字伯存爲文學
至御史病瞽遂廢次中庸中行皆名有文咸爲官
早死

柳登柳冕者族子也自其父芳善文史與冕並居集
賢書府冕文學益健頗躁自吏部郎中出爲刺史

至福建廉使卒登晚仕至尚書郎祕書少監

薛丹同郡人至尚書郎

呂牧東平人由尚書郎刺澤州卒

崔稹清河人至檢校郎官子群爲右補闕贈給事中

房啓河南人善清言由萬年令爲容州經略

于申河南人至尚書郎

常仲孺河南人今爲諫議大夫

蘇弁武功人好聚書至三萬卷與先君通書以戶部
侍郎貶復爲刺史

崔芄博陵人善言名理爲御史尚書郎

鄭元均滎陽人強抗少所推讓然以此多怨因不得位

辛暉隴西人有史學

韓衡昌黎人善士

陳衆甫梓潼人高志氣

薛伯高同郡人好讀書號爲長者後至尚書卒

張宣力清河人儒善後表其名去力但爲宣自元均至宣力皆沒沒無顯仕者

宗元曰先君之所與友凡天下善士舉集焉信讓而大顯道博而無雜今之世言交者以爲端敢悉書所尤厚者附茲石以銘于背如右

皮子世錄

唐 皮日休

皮子之先蓋鄭公之苗裔賢大夫子皮之後在戰國
及秦時無譜牒可考自漢至唐其英雄賢俊在位者
往往有焉前漢時名容者以善爲容官至大夫後漢
時名巡者爲太監令三國時無門焉晉朝名初者爲
襄陽太守名京者爲賢處士宋朝名熙祖者與徐廣
論議符王世名審者爲堅侍郎後魏世名豹子者爲
魏名將子道明襲爵弟喜爲使持節侍中都督秦雍

梁益諸軍事大將軍仇池鎮將假公如故喜以戰守之功累加勲爵後轉散騎常侍安南將軍豫州刺史卒于天宗爵喜弟雙仁冠軍將軍仇池鎮將北齊時名景和者以功大官封王名延宗者爲黃門侍郎隋朝名子信者爲刺史至于吾唐汨汨於民間無能以文取位唯從祖翁諱瑕叔舉進士有名以剛柔不合時受蜀聘爲幕府累官至刺史從翁諱行修明經及第累官至項城令以盜不發貶州椽卒時日休之世以遠祖襄陽太守子孫因家襄陽之竟陵世世爲襄

陽人自有唐已來或農竟陵或隱鹿門皆不拘冠冕以至皮子嗚呼聖賢命世世不賤不足以立志地不卑不足以立名是知老子產於厲鄉仲尼生於闕里苟使李乾早胎老子豈降叔梁早胤仲尼不生賢旣家有不足爲立大功致大化振大名者其在斯乎

盧氏雜說

唐 盧言

李絳

憲宗時中官吐突承瓘有恩澤欲爲上立德政碑碑屋已成磨礱石訖請宣索文時李絳爲翰林學士奏曰大人者與天地合其德日月合其明無立碑紀美之事恐取笑夷夏上深然之遽命拆屋廢石承瓘奏碑屋用功極多難便毀拆欲堅其請上曰急索牛搜倒其納諫如此

文宗

文宗命中使宣兩軍中尉及諸司使內官等不許着紗縠綾羅巾其後駙馬韋處仁見巾夾羅巾以進上曰本慕卿門戶清素故俯從選尚如此巾服從他諸戚爲之卿不須爲也

鄭餘慶

鄭餘慶清儉有重德一日忽召親朋官數人會食衆皆驚朝僚以故相望重皆凌晨請之至日高餘慶方出閑話移時諸人皆囂然餘慶呼左右曰處方廚家

爛蒸去毛莫拘折項諸人相顧以爲必蒸鷺鴨之類遂巡昇臺盤出醬醋亦極香新良久就餐每人前下粟米飯一椀蒸胡蘆一枚相國饗美諸人強進而罷

宣宗

宣宗酷好進士及第每對朝臣問及第苟有科名對者必大喜便問所試詩賦題目并主司姓名或有人物稍好者偶不中第嘆惜移時常於內自題鄉貢進士李道龍

內出題

開成中高諧知舉內出霓裳羽衣曲賦太學創置石
經詩進士試詩賦自此始也

鄭薰

鄭薰知舉放榜日唯舍人畢誠到宅謝恩至蕭做放
榜日並無朱紫及門時論謂之

裴德融

裴德融諱臯值高諧知舉入試主司曰伊諱臯某某
下就試與及第困一生事後除屯田員外郎將盧簡
求爲右丞裴與除郎官一人同參到宅右丞先屈前

一人入從容多時前人啟云某與新除屯田裴員外
同祗候右丞裴員外在門外多時盧遽使驅使官傳
語曰員外是何人下及第偶有事不得奉見裴倉皇
失錯騎前人馬出門去

李景讓

大中年丞郎宴席蔣伸在座忽斟一盃言曰席上有
孝于家忠于國及名重于時者飲此爵衆皆肅然無
敢舉者獨李公景讓起引此爵蔣曰此宜其然

夏侯孜

盧氏新詩
崔郢爲京尹日三司使在永達亭子宴丞郎崔乘酒
突飲衆人皆延之時譙公夏侯孜爲戶部使問曰尹
曾任給舍否崔曰無譙公曰若不曾歷給舍京兆尹
不合衝丞郎宴命酒糺來命下籌且喫罰爵取三大
器物引滿飲之良久方起

撰刀霸長

侯白捷辨楊素與相善素關中人白山東人素嘗卒
難之欲其無對而關中下俚人言音謂水爲霸山東
山東亦言擊將去爲櫟刀素嘗戲白曰山東固多仁

義借一而得兩曰若爲得兩曰有人從某借弓者乃
曰櫟刀去豈非借一而得兩白應聲曰關中人亦甚
聰明問一知二素曰何以得知曰日有人問比來多
雨渭水漲否答曰霸長豈非問一知二素伏其辨捷
也

零陵總記

唐 陸龜蒙

李義山

李義山遊長安投宿旅店適會客因召與坐不知爲
義山也酒酣客賦木蘭花詩衆皆誇示義山后成詩
曰洞庭波冷曉侵雲日日征帆送遠人幾度木蘭舟
上望不知花是此船身坐客大驚詢之方知是義山
也

李邕

李邕常不許蕭誠書乃作詐古帖令紙故暗特示邕
曰此乃右軍真跡如何邕看稱善誠實以告之復取
視曰細看亦未能好

嚴安之

嚴安之崔潭俱爲赤尉安之令伍伯執大杖潭亦大
甚杖至如椽安之復令執小杖潭亦益小甚杖至如
著安之令伍伯空手乃不復學也

庾倬

新野庾倬爲河南府兵曹有寡姊在家時洛中物價

翔貴難致口腹庾常於公堂輟已饌以餉其姊始言
所愛小男以餉之同官初甚鄙笑後知之咸嘉歎倬
生簡休

李牟

李牟秋夜吹笛於瓜洲舟檝甚隘初發調羣動皆息
及數奏微風颯然而至又俄頃舟人賈客皆有怨歎
悲泣之聲

補闕母

補闕母照博學有著述才上表請修古史先撰目錄

以進玄宗稱善賜絹百疋

書生

有書生讀經書甚精熟不知近代事因說駱賓王遂云某識其孫李少府者兄弟太多意謂駱賓是諸王封號也

回鶻

回鶻常與摩尼議政故京師爲之立寺其法日晚乃食敬水而茹葷不飲乳酪其大摩尼數年一易往來中國小者年轉江嶺西市商胡橐其源生於回鶻有

功也

李約

李約天性惟嗜茶能自煎謂人曰茶須緩火灸活火謂炭火之焰者也客至不限甌數竟日執持茶器不倦魯奉使行至陝州硤石縣東愛渠水清流旬日忘發

張登

張登長於小賦氣宏而密間不容髮有織成隱起行往感金之狀

薛調

薛調季瓚同年進士調美姿貌人號爲生菩薩瓚俊爽人號爲劍調寬恕而瓚猜忌論者以時人所稱協其性也

李直方

李直方常第果實若貢士者以綠李爲首楞梨爲二櫻桃爲三柑爲四蒲桃爲五或薦荔枝曰寄舉之又問栗如之何曰最有冗事不出八九始范曄以諸香品時輩候味虛撰百官本草皆此類也

周復

元稹在鄂州時周復爲從事稹嘗賦詩命院中屬和周簪笏見稹曰某偶以大人往還高謬獲一第其實詩賦皆不能也稹曰遽以實告賢於能詩者

薛元超

薛元超謂所親曰吾不才富貴過人平生有三恨始不以進士擢第不娶五姓女不得修國史

劉太真

貞元四年劉太真侍郎入貢院寄前主司蕭聽尚書

詩曰獨坐貢闈裏愁心芳草生山公昨夜事應見此
時情

于頔

于頔司空嘗令客彈琴其嫂知音聽於簾下日三分
中一分箏聲二分琵琶聲絕無琴韻

李沂公

李沂公雅好琴常斲桐又取漆桶爲之多至數百張
求者與之

鑿虛

鑿虛爲僧頗有風格而出入內道場賣弄權勢杖屨
於京兆府城中言鑿虛善煮羊脾傳以爲法

玉堂閑話

唐撰人闕

生贅肉

釋氏因時果有報應近歲有一男子既貧且賤於上
吻忽生一片贅肉如展兩手許大下覆其口形狀醜
異殆不可言其人每饑渴則揭贅肉以就飲啜頗甚
苦楚或問其所因則曰少年無賴曾在軍伍常於佛
寺安下同火共割一羊分得少肉旁有一佛像上吻
間可置之不數日嬰疾遂生此贅肉焉

西明寺

長安城西明寺鐘寇亂之後緇徒流離聞其寺者數年有貧民利其銅袖鎚鑿往竊鑿之日獲一二斤鬻於闐闐如是經年人皆知之官吏不禁後其家忽失在市銅者亦訝其不來後官欲徙其鐘於別寺見寺鐘平墮在閣上及仆之見盜鐘者抱鎚鑿儼然坐於其間卽已乾枯矣

馬全節婢

魏帥侍中馬全節嘗有侍婢偶不愜意自擊殺之後累年染重病忽見其婢立於前家久但訝全節之獨語如相問答初云爾來有何意又云與爾錢財復曰爲爾造像書經哀祈移時其亡婢不受但索命而已不旬日而卒

晉少主

開運甲辰歲暮冬晉帝遣中使至內署宣問諸學士云朕昨夜夢一玉盤中有一玉碗及一玉帶皆有碾文光熒可愛是何徵也宜卽奏來承旨李慎儀與同僚併表奏賀以爲王者帝王之寶也帶者有誓功之

兆盤孟者乃守器之象爲吉夢不敢有他占

郡牧

唐有膏梁子出刺郡人迎候甚至前任與之設交代之禮儀無闕者二禮生具頭冠禮衣相其賓主升降揖讓而新牧噴衄踖躅歛容低視不敢正面對禮生及禮畢使人再三傳話慰勞感謝皆莫涯其意翌日於內閣從禮生從容生極惶恐罔知去就旣坐頓蹙低語曰賢尊安否禮生唯唯又曰頃年營大事時極煩賢尊心力生亦憫然及罷有親知細詢之乃曰此

禮生緣方相子弟昔曾使他家君是以再三感謝且士流中亦有故爲輕薄者亦有昧於菽麥不能分別者信而有之

張咸光

梁龍德年有貧衣冠張咸光遊丐無度於梁宋之間復有劉月明者與咸光相類常懷七著每遊貴門卽遭虐戲方殮則奪其七著則袖中出而用之梁駙馬溫積諫議權判開封府事咸光忽遍詣豪門告別問其所詣則曰往投溫諫議也問有何紹介而往答曰

王堂開部 一
頃年大承記錄此行必厚遇也大諫嘗製碣山潛龍
官上梁文云饅頭似梳胡餅如籠暢殺劉月明主簿
喜殺張咸光秀才以此知必承顧盼聞者絕倒

市馬

洛中有大寮世籍膏粱不分牝牡偶市一馬都莫知
其妍媸爲駟僮所欺曰此馬不唯馴良齒及二十餘
歲合直兩馬之資况行不動塵可謂馴良之甚也遂
多金以市之僮既倍獲利臨去又曰此馬兼有楹梓
牙出也於是大喜詰且乘出如鶩鳴之行及至家矜

銜曰此馬不唯馴熟兼饒得果子牙兩所復召僮別
贈二十

上霄峯

補闕熊皎云廬山有上霄峯者去平地七千仞上有
古迹云是夏禹治水之時泊船之所鑿石爲竅以繫
纜焉磨崖爲碑皆科斗文字隱隱可見則知大禹之
功與天地不朽矣

振武角抵人

光啓年中左神策軍四軍軍使王卞出鎮振武置宴

樂戲既畢乃命角抵有一夫甚魁岸自隣州來此較
力軍中十數輩軀貌膂力悉不能敵主帥亦壯之遂
選三人相次而敵之魁岸者俱勝帥及座客稱善久
之時有一秀才坐于席上忽起告主帥曰某撲得此
人主帥頗駭其言所請既堅遂許之秀才降階先入
厨少頃而出遂掩縮衣服握左拳而前魁梧者微笑
曰此一指必倒矣及漸相逼急展左手示之魁岸者
憐然而倒合座大笑秀才徐步而出盥手而登席焉
主帥詰之何術也對曰頃年客逢魯于道店逢此人

纔近食按跟蹠而倒有同伴曰怕醬見之輒倒某聞
而志之適詣設厨求得少醬握在手中此人見之果
自倒聊宴設之歡笑耳有邊岫判官目覩其事

